

Deutschland sucht da gröschte Ondrhaltungsmüll

Wenn mr's Fernsehprogramm a'guckt, könnt mr grad moina, ganz Deutschland isch auf dr Suche noch irgendebbes: Deutschland sucht den Superstar, Deutschland sucht Germanys next Topmodel, Bauer sucht Frau, Papa gesucht, mr froggt sich, wer Millionär wird ond wer Dschungelkönig. Wer will des wissa? I net!

I frog mi, wer den ganze gssammelta Schoofscheiß bloß a'guckt? Wer hot soviel Zeit ond Langweil? Also i net, ond wenn i se hätt, no dät i se gwieß sinnvoller verbringa, als so en Bleed-sinn azomgucka. Kampfsender für Bildungslose RTL 2 Ondrschichtafernseh. So

hält mr sich sei Volk bleed ond generiert tumbes Wahlvolk für radikale A'sichta. 's Allerwiderlichschte, menschenverachtendschte, was i je gsäah han isch „Frauentausch“! Des Format sott ma ändera in „Präsidententausch“ No könnt mr da Trump noch Nordkorea ond da Kim en d USA schicke. Do wär ebbes botta.

Wer lässt sich bloß solche gequirlte Gülle eifalla. Sowohl die Haager Landkriegsordnung von 1899 als au die Genfer Konvention von 1949 verbietet, Gefangene zu quäla und zu demütiga. Zivilista sollat gschont, unnötige Opfer vermieda werden. Ond was macht des deutsche Fernseha mit



ons??? Des isch eindeutig en Fall fürs Haager Kriegsgericht. RTL isch wie Fukushima: dia strahlat so lang, bis alle krank send. Obwohl, i fend's eigentlich

garnet so schlemm, dass RTL sogenannte „Stars“, die koi Mensch kennt, en da Dschungel schickt. Viel schlechter isch, dass dia wieder rausglassa werdat.

I fend des ziemlich ungerrecht, dass Menscha, dia Stroh em Kopf hend, au no Geld wie Heu für Mischtkriagat ...

Neulich han i zufällig zappt ond ben in dem Hartz IV-TV glandet. Do hot so a wasserstoffperoxidblonde Schantalle gsait, dass se später mol em Süda leba will – en Schweden, oder so. I han no da Fernseh ausgeschaltet ond leis vor mi na gheult ond mi gfreut, dass es koi RTL III gibt...

Lesat liebr a guad's Buach.

Bis näggschd Woch'

Ihr
Wulf Wager
kolumne@wulf-wager.de